



Majlis Ugama Islam Singapura

Khutbah Jumaat

26 Februari 2016 / 17 Jamadilawal 1437H

**Syukur: Menggunakan Nikmat Dengan Bertanggungjawab**

الْحَمْدُ لِلَّهِ الَّذِي أَرْسَلَ رَسُولَهُ بِالْهُدَىٰ وَدِينِ الْحَقِّ بَشِيرًا وَنَذِيرًا  
وَدَاعِيًا إِلَى اللَّهِ بِإِذْنِهِ وَسِرَاجًا مُنِيرًا وَأَشْهَدُ أَنْ لَا إِلَهَ إِلَّا اللَّهُ  
وَحْدَهُ لَا شَرِيكَ لَهُ وَأَشْهَدُ أَنَّ سَيِّدَنَا مُحَمَّدًا عَبْدَهُ وَرَسُولَهُ  
وَصَفِيُّ اللَّهِ مِنْ خَلْقِهِ وَحَبِيبُهُ إِمَامُ الْأَنْبِيَاءِ وَسَيِّدُ الْمُرْسَلِينَ اللَّهُمَّ  
صَلِّ عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ وَسَلِّمْ تَسْلِيمًا كَثِيرًا.  
أَمَّا بَعْدُ فَيَا عِبَادَ اللَّهِ اتَّقُوا اللَّهَ حَقَّ تَقَاتِهِ وَلَا تَمُوتُنَّ إِلَّا وَأَنْتُمْ  
مُسْلِمُونَ

Sidang Jumaat yang dirahmati Allah,

Marilah kita tingkatkan ketakwaan kita kepada Allah s.w.t. Usahakan agar kita menggunakan segala nikmat Allah untuk mentaatinya dan mengelakkan daripada melanggar larangannya. Mudah-mudahan dengan yang demikian Allah s.w.t. melimpahkan kasih sayangNya buat kita sekeluarga.

Saudara,

Selama beberapa minggu ini kita telah diingatkan akan kelebihan sifat syukur dalam memberi kekuatan dan ketabahan.

Ia juga memastikan kita ini tidak lupa akan Allah, Sang Pengurnia nikmat.

Begitu pentingnya sifat syukur ini sehinggakan Nabi Allah Sulaiman a.s. memohon daripada Allah s.w.t. agar dikurniakan sifat sedemikian. Allah berfirman dalam Surah An-Naml ayat 19:

فَبَسَّمَ ضَاحِكًا مِّن قَوْلِهَا وَقَالَ رَبِّ أَوْزِعْنِي أَنْ أَشْكُرَ نِعْمَتَكَ  
الَّتِي أَنْعَمْتَ عَلَيَّ وَعَلَىٰ وَالِدَيَّ وَأَنْ أَعْمَلَ صَالِحًا تَرْضَاهُ وَأَدْخِلْنِي  
بِرَحْمَتِكَ فِي عِبَادِكَ الصَّالِحِينَ

Yang bermaksud: *“Maka tersenyumlah Nabi Sulaiman mendengar kata-kata semut itu lalu berdoa dengan berkata: Wahai Tuhanku, ilhamkanlah daku agar tetap bersyukur akan nikmatMu yang Engkau kurniakan kepadaku dan kepada ibu bapakku, dan supaya aku tetap mengerjakan amal soleh yang Engkau redhai, dan masukkanlah daku dengan limpah rahmatMu ke dalam golongan hamba-hambaMu yang soleh”.*

Doa Nabi Sulaiman ini cukup indah dan boleh kita jadikan amalan. Ia juga merupakan peringatan agar kita tidak mengabaikan nikmat Allah s.w.t. Saudara, seperti yang disebutkan sebelum ini, sifat syukur yang sebenar adalah apabila kita dengan sedar menggunakan nikmat dan kurniaan Allah untuk terus berkhidmat kepadaNya dan mendekatkan diri

kepadaNya. Selepas memohon dikurniakan sifat syukur, doa ini diteruskan dengan memohon agar kita tergolong bersama solihin. Ini mengingatkan kita bahawa segala nikmat yang kita raih daripada Allah s.w.t. seharusnya mendorong kita untuk menjadi seorang yang lebih soleh, lebih giat beramal bakti menabur kebajikan. Bahkan ayat ini mengingatkan kita akan kepentingan menjaga nikmat tersebut agar tidak disia-siakan.

Untuk itu, saya mengajak setiap individu untuk merenungkan, berapa banyakkah nikmat yang telah kita gunakan untuk kebaikan dan berapa banyak lagi nikmat yang telah dan masih kita abaikan?

Rasulullah s.a.w. pernah mengingatkan kita dalam hadithnya yang bermaksud: *“Rebutlah lima perkara sebelum datangnya lima perkara. Masa sihat sebelum sakit. Masa kaya sebelum datangnya masa sempit (iaitu kemiskinan). Masa lapang sebelum tiba masa sibuk. Masa mudamu sebelum datang masa tua dan masa hidup sebelum tiba masa mati”*. [Hadith riwayat al-Hakim dan al-Baihaqi]

Saudara, bagaimanakah telah kita habiskan usia kita selama ini? Pernahkah kita tanyakan diri kita, seandainya aku ini diundang Allah kembali kepadaNya sebentar nanti, apakah yang aku persembahkan? Apakah kebaikan yang telah aku tinggalkan? Bagaimanakah akan ku jawab soalan di hadapan

Allah ketika ditanya bagaimana aku menghabiskan usiaku, samada telah ku belanjakan hartaku untuk kebaikan dan samada telah aku amalkan ilmu yang ada padaku?

Saudara, soalan-soalan ini perlu sering kita tanyakan pada diri kita sendiri. Ini adalah agar kita tidak dilalaikan dengan buaian kesenangan dan keselesaan.

Contohnya ketika tubuh kita masih sihat dan cergas, adalah mudah untuk kita tidak merasakan keperluan untuk menjaga pemakanan mahupun mengamalkan gaya hidup yang sihat. Ketika masih dikurniakan Allah kelebihan harta mungkin sahaja kita sibuk berbelanja untuk diri sendiri tanpa mengeneipkan sebahagian daripadanya untuk waktu-waktu sempit dan untuk membantu orang lain yang berada dalam kesempitan. Atau, ketika kita masih muda, kita rasakan bahawa masih banyak masa lagi untuk kita beribadah nanti apabila lebih tua dan sekarang adalah masa untuk kita berfoya-foya.

Namun ingatlah saudara, sepertimana hidup ini tidak kekal, begitu juga nikmat Allah s.w.t. Apakah kita tahu bila ajal akan datang bertandang? Apakah kita tahu jika esok kita masih lagi sihat untuk beribadah seperti hari ini? Dunia ini penuh dengan kemungkinan yang tidak disangka. Contohnya, keadaan ekonomi hari ini amat tidak menentu. Maka seharusnya kita merancang perbelanjaan kita. Mudah-mudahan, seandainya

kita terkesan pun dengan pembuangan kerja dan sebagainya, kita mempunyai persediaan menampung keperluan keluarga. Bahkan mungkin sahaja kita dikurniakan kelebihan, yang dapat kita kongsi bersama mereka yang memerlukan nanti.

Ini merupakan salah satu bentuk syukur saudara. Iaitu memastikan nikmat digunakan dengan penuh tanggungjawab dan kesedaran. Janganlah kita hanya menanti sahaja, sehingga ditimpa kemalangan, malapetaka dan kesempitan barulah kita sedari dan hargai segala nikmat itu.

Jika anda masih mendengar bicara saya ini, bererti masih belum terlambat untuk kita bermuhasabah, mengambil langkah dan merubah gaya hidup kita. Ini adalah agar akhirnya, kita memastikan segala nikmat, tidak kira nikmat usia, harta, keluarga, sumber alam, kesihatan dan keamanan negara ini, dapat terus kita manfaatkan untuk kebaikan.

Ya Allah, Tuhan yang Maha Pemurah lagi Maha Pengasih, kami tadahkan tangan kami dan kami rendahkan hati kami ketika ini memohon kesyukuran daripadaMu. Jadikanlah kami orang-orang yang tidak mengabaikan nikmatMu. Suburkanlah di dalam jiwa kami kesyukuran agar dengannya kami menggunakan nikmatMu untuk kebaikan. Kurniakanlah kepada kami Ya Allah, kesyukuran yang menerbitkan kekuatan, kesyukuran yang mencambahkan ketabahan, kesyukuran yang

melahirkan kedamaian. Damaikanlah kehidupan kami dengan kesyukuran. Bahagiakanlah keluarga kami dengan kesyukuran. Siramilah negara kami ini dengan keberkatan dan keamanan.

بَارَكَ اللهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ  
الآيَاتِ وَالذِّكْرِ الْحَكِيمِ، وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ  
الْعَلِيمُ، أَقُولُ قَوْلِي هَذَا وَأَسْتَغْفِرُ اللهَ الْعَظِيمَ لِي وَلَكُمْ، وَلِسَائِرِ  
الْمُسْلِمِينَ وَالْمُسْلِمَاتِ، وَالْمُؤْمِنِينَ وَالْمُؤْمِنَاتِ، فَاسْتَغْفِرُوهُ فَيَا  
فَوْزَ الْمُسْتَغْفِرِينَ وَيَا نَجَاةَ التَّائِبِينَ.